

पत्रुससे भिबा न्हीरेमला चिठी

चु चिठीला बारेरी पाङ्तोःमा

भिबा म्हि: येशूला मुल चेला पत्रुससे भिबा मुबा (२ पत्रुस १:१)।

भिबा ग्ला: पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाङ्बा मुला।

भिबा साल: ओस्पन ईश्वी संवत् ६५-६८ (विक्रम संवत् १२२-१२५) सालला गुडरी भिबा मुबा। चु चिठी पत्रुससे हाड सिबा भन्दा डाच्छा भिजी (२ पत्रुस १:१४)।

खाल्दा भिबा: ख्रीष्टदा विश्वास लबा जम्बुलिङला जम्मान ग्लारी ससा बडबड तसी चिबा म्हिगदेदा भिबा मुबा।

चु चिठी भिबा चा लुसीला ताम लोण्बा म्हिगदेसे लोण्बा तामदेन थे तामग्याम खबा आज्यबा तामगदेदा ज्यबा तना लबारी हिन्ना। थे लुसीला ताम लोण्बा म्हिगदेसे चा येशू दोःसी आफेप्ख भिसी पाङ्बा मुबा। तर पत्रुससे थे लुसीला ताम लोण्बा म्हिगदेला ताम थाबान, “जम्मासेन हाडला पाप ख्लासी परमेश्वरपट्टि दोःगै ओच्छे खालैनोन नाश थातगै भिसी प्रभुसे एनीगदेदा भ्रान्बा मुला” (२ पत्रुस ३:६) भिबा परमेश्वरला सेम मुबासे लमा ख्रीष्ट घइसी फेप्खबा हिन्ना भिसी पाङ्बा मुला।

मुल तामगदे

- फ्याफुल्बा १:१-२
- विश्वासीगदेदा ड्योइबा १:३-२१
- लुसीला ताम लोण्बा म्हिगदे २:१-२२
- ख्रीष्ट दोःसी फेप्खबा ताम ३:१-१८

पत्रुससे भिबा न्हीरेमला चिठी

१ लास्सो, येशू ख्रीष्टदा तेन्बा डा मुल चेला सिमोन पत्रुसग्याम फ्याफुल्ला। डाइ चु ताम ज्यबादेन ठीक गे लबा य्हाङला परमेश्वरदेन थाबा पिन्बा येशू ख्रीष्टदा डन्से हङ लसीन विश्वास लबा एनीगदेदा भिबा हिन्ना।

२ एनीगदेसे परमेश्वरदेन य्हाङला प्रभु येशू ख्रीष्टदा डोसेबासे लमा ल्हानान दयामायादेन शान्ति याङ्बान निगै।

ख्रीष्टसे धम्बा म्हि हङ लसी भ्रउ

३ परमेश्वरसे ह्हाङला घेन शक्ति-ग्याम थेसे म्हन्बा अन्छारला म्हि स्होबाला लागिरी थेसे य्हाङदा तोःबा जम्मान स्हे पिन्बा मुला। घेन य्हालदेन शक्ति ओच्छे ज्यबा गुणग्याम ड्योइबा परमेश्वरदा य्हाङसे डोसेबासे लमा चु जम्मान स्हे याङ्बा हिन्ना। ४ थेहङ लसीन परमेश्वरसे पिन्ना भिसी लबा ग्लुसीन आयाङ्बा घेन कबुलगदे परमेश्वरसे य्हाङदा पिन्बा मुला। चु चा जम्बुलिङरी मुबा नाश तसी निबा आज्यबा तामगदेग्याम थोन्सी

परमेश्वरला बानीबेहोर थोसी भ्रबाला लागिरी हिन्ना।

५ थेतबासेलमा एनीगदेसे खम्तेधोना विश्वासदेन छ्याम छ्यामनोन ज्यबा बानीबेहोर थोगो। चुदे जे आहिन, ज्यबा बानीबेहोर लबा ज्ञान बुद्धि मुबा म्हि एनोन दोगो। ६ थेहङ लसीन ह्हाङसे ह्हाङदान तहरी थान्बा, जस्तोन दुख तसे नाखम्बादेन सदन परमेश्वरदा ढन्बा म्हि एनोन दोगो। ७ चुदे जे आहिन, अक्क एनीगदे विश्वास लबा ज्योज्यो आले नाना आडागदेदा वास्ता लबादेन माया लबा म्हि दोगो। ८ चु चा एनीगदे न्हङरी आरेनान आतबा गुण हिन्ना, चुदे एनीगदेसे चु जम्मान गुणगदे थोजी भिसम एनीगदे य्हाङला प्रभु येशू ख्रीष्टला ज्ञान बुद्धिरी बढब तबान निसी एनीगदेसे लबा जम्मान गेगदे ज्यबादेन गे खेल्बा तला। ९ तर चु गुणगदे आरेबा म्हिगदे चा थारेङला ताम आम्राङ्बादेन काना म्हि हङ्बान हिन्ना। चुहङ्बा म्हिसे ह्हाङसे लबा डाच्छाला पापला दोष परमेश्वरसे मेटब लजी भिबा तामनोन म्लेःबा मुला।

१० थेतबासेलमा ज्योज्यो आले नाना आडागदे, परमेश्वरसे एनीगदेदा धम्बा तामदा आम्ले:ना भन सदन भन्सी चिउ। चुहङ् लजी भिसम एनीगदेसे लबा विश्वास खाइमै आम्हा। ११ चुहङ् लसी यहाडला प्रभु थार्बा पिन्बा येशू ख्रीष्टला जुकजुकधोनाला यहुल्सारी वाङ्मा एनीगदेदा ल्हानान मान लला।

१२ थेतबासेलमा चु तामगदे डाइ एनीगदेदा सदन ढन्ना लला। हिन्बाम, चु जम्मान ताम एनीगदेदा था मुला। ओच्छे एनीगदेदा लोप्बा सत्य तामरीनोन एनीगदे कोङ्सी चिबा मुला। १३ डा सोतेधोना चु जम्मान ताम एनीगदेदा ढन्ना लबान होशियार तना लबा चा ज्यबा हिन्ना भिसी डाइ म्हन्बा मुला। १४ तिग्दा भिसम डा योनान चु जम्बुलिङ् रूलासी निबान मुला भिसी डादा यहाडला प्रभु येशू ख्रीष्टसे डाच्छान उन्बा मुला। १५ डा सिसी निसैनोन चु जम्मान ताम एनीगदेसे सदन ढन्नौ भिसी खन्तेधोना डाइ एनीगदेदा घोना लबा हिन्ना।

पत्रुससे ख्रीष्टला शक्ति म्राङ्जी

१६ यहाडला प्रभु येशू ख्रीष्ट घेन शक्तिरी फेप्खजी भिसी डन्से पाङ्बा चु ताम चलाक म्हिसे म्हन्सी स्होबा कथाग्याम पाङ्बा आहिन। तर

ख्रीष्टला घेन शक्ति डन्देन छ्यामनोन मुबासे लमा डन्से चु ताम पाङ्बा हिन्ना। १७ परमेश्वर आबासे ख्रीष्टदा हाडला यहालदेन शक्ति ओच्छे मान पिन्जी, ओच्छे “चु डाइ सेमहेन्से माया लबा डाला भा हिन्ना, चु म्राङ्सी डा ल्हानान ताङ्बा मुला” भिबा स्वर्गग्याम परमेश्वरला घेन काइ खजी। * १८ थे चोखो गडरी डनी ख्रीष्टदेन छ्याम मुबा धुइरी स्वर्गग्याम खबा चु काइ डन्सेन थे:बा मुबा।

१९ चुहङ् लसीन अगमवक्तागदेसे थे:ना लबा परमेश्वरला बचनरी डनी ढुक्क तबा मुला। थेतबासेलमा स्थोरी रमरम रिमरिम आततेधोना ओच्छे एनीगदेला सेमरी स्थोला सुक्र आथोन्तेधोना† धोपधोपरी नाडसल म्रासी थान्बा हङ् लसी चु बचन एनीगदेसे हाडला सेमरी थान्जी भिसम ज्यबा तला। २० तर परमेश्वरला बचनरी अगमवक्तागदेसे पाङ्बा ताम चा थेनीगदेसे म्हन्सी घोना लबारी म्हाइबा ताम आहिन भिसी एनीगदेसे घोतो:ला। २१ तिग्दा भिसम अगमवक्तागदेसे पाङ्बा ताम थेन्ना सेमरी म्हन्सी पाङ्बा ताम आहिन। तर परमेश्वरला आत्मासे उन्बा अन्छार थेनीगदेसे परमेश्वरग्याम खबा ताम पाङ्बा हिन्ना।

१:१६ “स्थोला सुक्र आथोन्तेधोना” भिबा चा प्रभु दो:सी आफेप्खतेधोना भिबा हिन्ना।

१:१७ मत्ती १७:१-५; मर्कू ६:२-७; लूका ६:२८-३५

लुसीला ताम लोप्बा म्हिगदे

२ तर इस्राएलीगदेला गुडरी लुसीला ताम लोप्बा अगमवक्ता-गदे मुबा। थेहङ् लसीन एनीगदेला गुडरीनोन लुसीला ताम लोप्बा म्हिगदे थोन्ना। थेनीगदेसे खालैदा था आतना लसी नाश लबा लुसीला ताम लोप्ला। चुदे जे आहिन, थेनीगदेसे ह्वाङला पापला सय फासी थाना लबा प्रभुदान खलाला। ओच्छे थेनीगदेसे लबा गेग्यामसेन थेनीगदे तिकखुरीन नाश तला। २ ल्हानान म्हिगदे थेनीगदेसे उन्बा आज्यबा ग्यामरी भ्रसी पेःबा खबा गेगदे लला। थेनीगदेसे लोप्बा ताम ड्यान्बा म्हिगदेसे लमान सत्य ग्यामला बिरोध लला। ३ लोभरी वाङ्सी थेनीगदेसे लुसीला ताम लोप्सी एनीगदेग्याम फाइदा किन्ना। तर परमेश्वरसे थेनीगदेला निसाफ डाच्छान लसी जिन्बा मुला। थेतबासेलमा थेनीगदे नाश तनोन तला।

४ परमेश्वरसे पाप लबा स्वर्गदूत-गदेदाएनोन आखलानी। ओच्छे थेनीगदेदा नर्गरी भ्याङ्जी। तर निसाफ लबा धिनधोनाला लागिरी थेनीगदेदा धोपधोप्बा ग्लारी खीसी थान्बा मुला। ५ दङबोरी परमेश्वरसे जम्बुलिङला म्हिगदेदाएनोन आखलानी। ओच्छे परमेश्वरसे कुल्बा

ताम आङ्यान्बागदेदा परमेश्वरसे नामदेन भाल बाढीग्याम नाश लजी। तर ह्वाङदा सेम निबा ताम थेःना लबा नोआदेन स्थान्दो म्हि निसदा चा नामदेन भालग्याम जोगब लसी थान्जी। * ६ थेहङ् लसीन परमेश्वरसे सदोमदेन गमोरा भिबा शहरलाएनोन दोष स्याप्सी मेग्याम नाश लजी। थेतबासेलमा परमेश्वरसे कुल्बा ताम आङ्यान्बा म्हिगदेला गति खाहङ्बा तला भिसी चुग्यामसेन था याङ्ला। * ७ आज्यबा बानीबेहोर मुबा पेःबा खबा गेगदे लसी भ्रबा म्हिगदे म्वाङ्सी दुख नासी चिबा ज्यबा म्हि लोतदा चा परमेश्वरसे जोगब लजी। * ८ थे आज्यबा म्हिगदेला गुडरी चिमा थेनीगदेसे धिन धिननोन लबा पेःबा खबा गे थेःसी, म्वाङ्सी ज्यबा म्हि लोतला सेमरी ल्हानान दुख तजी। ९ चुहङ् लसी ह्वाङदा तेन्बा म्हिगदेदा दुखग्याम खाहङ् लसी जोगब लसी थान्तोःला। ओच्छे नङ्बा गे लबागदेला निसाफ लबा धिनधोनाला लागिरी खाहङ् लसी खीसी थान्तोःमुला भिबा ताम प्रभुदा था मुला। १० थेनीगदेसे चा खास लसी म्हिदा न्होङ्ना लबा पेःबा खबा गेगदे जे लसी भ्रमुला। ओच्छे परमेश्वरला अधिकारदा हेला लमुला। स्वर्गरी मुबागदेदा बिरोध लबारीनोन आलोङ्मुला।

चुहङ्बा म्हिगदे चा मूर्खदेन घमण्डी तमुला। ११तर स्वर्गदूतगदे लुसीला ताम लोप्बागदे भन्दा ल्हानान शक्तिशालीदेन घेन मुला। तसैनोन स्वर्गदूतगदेसे प्रभुला डाच्छा स्वर्गरी मुबागदेदा बङ्सी दोष आलमुला। १२थेहङ्बा लुसीला ताम लोप्बा म्हिगदेसे चा हाडसे घोनोन आघोबा तामगदेला बिरोध लमुला। थेनीगदे ज्ञान बुद्धि आरेबा जन्तु हङ्बान मुला। थेतबासेलमा थेनीगदे सदन हाडला बानीबेहोरला तहरी चिमुबा। ओच्छे थेनीगदे चुङ्सी साइबाला लागिरी न्हबा जन्तु हङ्बान मुला। थेतबासेलमा थेनीगदे पशु हङ् तसी नाश तला।

१३थेनीगदेसे लबा आज्यबा गेला सजाय थेनीगदेसेन नातोःला। धिनगुङ्गरीन सेमरी जे लइ म्हन्बा थेनोन लबा चा ताङ्तोःबा ताम हिन्ना भिसी थेनीगदेसे म्हन्मुला। थेनीगदेसे एनीगदेदेन छ्याम भोज चबा धुङ्गरीनोन एनीगदेदा फसब लइ भिसी म्हन्मुला। एनीगदेदा न्होङ्ना लबादेन पेःना लबा चु म्हिगदेन हिन्ना। १४थेनीगदे सदन स्थान्दोदेन छ्याम ब्रेल्बा सेम जे थोसी भ्रमुला, ओच्छे जतिन पाप लसैनोन थेनीगदेसे अभ्र पाप लबारी आरुलामुला। थेनीगदेसे विश्वासरी कमजोर मुबा म्हिगदेदा फसब लमुला। थेनीगदेला सेम लोभसे

प्लिङ्बा मुला। परमेश्वरग्याम सजाय याङ्बा चुगदेन हिन्ना। १५थेनीगदेसे ज्यबा ग्याम रुलासी खानड भ्रइ म्हन्बा थेरीन भ्रजी। ओच्छे थेनीगदेसे बओरला भा बालामसे हङ् लसी टाङ्गाला लिच्छा भ्रसी आज्यबा गे लसी भ्रजी।* १६तर बालामसे लबा चुहङ्बा पापसे लमा थेसे बङ्बा नातोःजी। ओच्छे तामनोन आपाङ्बा गधासे म्हिसे हङ्गनोन ताम पाङ्सी थे अगमवक्तादा मूर्ख गे लआपुङ्नी।

१७थेहङ्बा म्हिगदे खर्सी निबा क्युङ्गला मुहानदेन लाबालुङ्गसरसे फ्याङ्ना लबा खसु हङ्बान हिन्ना। थेनीगदेला लागिरी परमेश्वरसे धोपधोप्बा ग्ला स्होसी थान्बा मुला। १८थेनीगदेसे गे आखेल्ला घेन घेन ताम पाङ्सी भ्रमुला। ओच्छे भर्खर आज्यबा गे रुलाबा म्हिगदेदा ल्हुङ्गला लागिरी सेमसे जे लइ म्हन्बा थेनोन लम्याङ्गला भिसी लोभ उन्सी फसब लमुला। १९थेनीगदेसे म्हिगदेदा पापग्याम फेना लला भिसी कबुल लसी भ्रमुला। तर कबुल लबा म्हिगदे हाङ्गनोन पापला नोकर दोःसी भ्रमुला। तिग्दा भिसम जुन तामसे म्हिगदेदा तहरी थान्ना थेनीगदे थेनोन तामला नोकर हिन्ना। २०तर चुदे खालै म्हिसे यहाडला प्रभु थार्बा पिन्बा येशू ख्रीष्टदा डोसेसी जम्बुलिङ्गला नङ्बा तामगदेग्याम फेसी जिन्सीनोन दोःसी

थेनोन नइबा तामरी फसब तजी भिसम
थेनीगदेला गति डाच्छाला भन्दा भन
आज्यबा तला। ^{२१}परमेश्वरसे कुल्बा
ताम अन्छार भ्रतोःला भिबा ताम था
याङ्सीनोन थे ताम रूलाबा म्हिसे
मी बरु परमेश्वरदा सेम निबा म्हि
दोःसी भ्रतोःला भिबा ताम खाइमै
था आयाङ्बा हिन्सम ज्यबा तसेला
मुबा। ^{२२}थेनीगदे चा “नगीसे ह्वाङसेन
रुइसी दोःसी ह्वाङसेन चमुला”
भिबादेन “ढ्वादा जतिन नुहाब लसै
दोःसी हिलोरी क्याल्मुला” भिबा
सत्य उखानसे पाङ्बा हङ्बान
हिन्ना। *

प्रभु दोःसी फेप्खबा धिन

३ डाला सेम निबा होगदे, डाइ
एनीगदेदा भिबा चु न्हीरिमला
चिठी हिन्ना, एनीगदेला सेमसे चोखो
ताम म्हन्गै भिसी चु चिठी न्हीरीन
गाते तामगदे ढन्ना लबा मुला।
^२ओच्छे ल्हानान डाच्छा परमेश्वरला
अगमवक्तागदेसे पाङ्बा तामदेन मुल
चेलागदेसे एनीगदेदा थेःना लबा
य्हाङला थार्बा पिन्बा प्रभुसे कुल्बा
तामदा एनीगदेसे सदन ढन्गै भिसी
डाइ म्हन्बा मुला।

^३जम्मान भन्दा डाच्छा एनीगदेसे
चु ताम घोटोःला, लिच्छाला धिनरी
ह्वाङलान सेमला तहरी भ्रबा म्हिगदे

थोन्ना। थे म्हिगदेसे एनीगदेसे
विश्वास लबा सत्य तामदा खिसी
लबान चुहङ् भिसी पाङ्ला, *
^४“ख्रीष्टसे डा दोःसी खला भिसी
कबुल लमुबा आहिन? खाइ खबा?
य्हाङला आखे म्हेमेनोन सिसी निजी,
चु जम्बुलिङ छ्यामाहेन्से तबा जम्मान
ताम दान्देधोनाएनोन तबान मुला।”

^५तर परमेश्वरसे बचनग्यामसेन
मुदेन जम्बुलिङ डाच्छान स्होबा
हिन्ना, ओच्छे जम्बुलिङ चा क्युइला
गुडरी क्युइग्यामसेन स्होबा हिन्ना
भिबा ताम था याङ्सीनोन थेनीगदेसे
वास्ता आलमुला। * ^६थेनोन क्युइसे
जम्बुलिङ डुबब लसी नाश तजी। *
^७तर परमेश्वरदा आतेन्बा म्हिगदेला
निसाफ लसी सजाय पिन्बा धिनना
लागिरी थेनोन परमेश्वरला बचनसे
दान्देला मुदेन जम्बुलिङदा मेग्याम
नाश लबाला लागिरी जोगब लसी
थान्बा मुला।

^८डाला सेम निबा होगदे, प्रभुला
लागिरी धिन गिक हजार दिङ ते तला,
हजार दिङ धिन गिक तेएनोन तला
भिबा ताम एनीगदेसे थाम्लेःगो। *
^९ह्वाङसे लबा कबुल पूरा लबारी
प्रभुसे घइना लला भिसी कोइ कोइ
म्हिसे पाङ्सैनोन प्रभुसे घइना आल।
तर जम्मासेन ह्वाङला पाप रूलासी
परमेश्वरपट्टि दोःगै ओच्छे खालैनोन

नाश थातगै भिसी प्रभुसे एनीगदेदा भ्रान्बा मुला।

१० तर प्रभु दोःसी फेप्खमा य्हो खबा हङ् लसी फेप्खला। थे धुइरी मु गुडुङ्बा हङ्बा घेन आवाज खसी मु म्हासी निला, ओच्छे मुरी मुबा जम्मान स्हे चा मेला रापसे ड्युला, ओच्छे जम्बुलिङ्गदेन थेरी मुबा जम्मान स्हे क्रोसी नाश तला।*

११ चु जम्मान स्हेगदे चुहङ् लसी ड्युसी निला भिबा ताम था तबासे लमा एनीगदे खाहङ्बा म्हि ततोःला भिसम एनीगदे परमेश्वरदा सेम निबा बानीबेहोर थोबादेन सदन परमेश्वरदा ढन्बा म्हि दोतोःला। १२ एनीगदेसे परमेश्वरसे निसाफ लबा धिन योनान खगै भिसी म्हन्सी भ्रान्बा मुला। थे धिनरी मु मेसे क्रोसी नाश तला। ओच्छे मुरी मुबा जम्मान स्हेगदे चा मेला रापसे ड्युला। १३ तर प्रभुसे कबुल लबा अन्छार य्हाङ् चा छार मुदेन छार जम्बुलिङ्गला ग्याम च्यासी चिला। थे छार जम्बुलिङ्गरी जम्मान म्हिगदेसे परमेश्वरदा सेम निबा गे जे लला।*

१४ थेतबासेलमा डाला सेम निबा होगदे, एनीगदे चु ताम तला भिसी भ्रान्सी चिबासे लमा परमेश्वरला शान्तिरी गिक तसी चिबाला लागिरी

परमेश्वरला डाच्छा तिगै दागदेन दोष आरेबा म्हि दोबारी भङ लउ। १५ य्हाङ्गला प्रभु योनान आफेप्खबा चा म्हिगदेसे थार्बा याङ्बा हिन्ना भिसी म्हन्गो। य्हाङ्गला सेम निबा आले पावलसेनोन प्रभुसे पिन्बा ज्ञान बुद्धिग्याम एनीगदेदा चुनोन ताम भिबा मुबा। १६ थेसे भिबा जम्मान चिठीरीनोन थेसे चु तामगदे भिबा मुला। थेसे भिबा चिठीगदेरी कोइ कोइ ताम चा घोबारी गाहो मुला। थेतबासेलमा आघोबादेन तिगै तामरी टुङ्गो आरेबा म्हिगदेसे परमेश्वरला बचनरी मुबा तामदा उल्टोपाल्टो लबा हङ् लसी थे तामगदेदाएनोन उल्टोपाल्टो लसी हाङ्गसे हाङ्गदान नाश लबा गे लमुला।

१७ थेतबासेलमा डाला सेम निबा होगदे, एनीगदेदा चु ताम डाच्छाहेन्सेन था मुबासे लमा होशियार तसी चिउ। परमेश्वरला बचन आङ्गान्बादेन तिगै तामदा वास्ता आलबा न्होङ्बा म्हिगदेला तामरी अलमल तसी हाङ्गसे लबा विश्वासदा थारुलागो। १८ तर य्हाङ्गला प्रभु थार्बा पिन्बा येशू ख्रीष्टला दयामायादेन थेसे पिन्बा ज्ञानरी बढब तबान निउ। प्रभुदा तिनी, न्हङ्गर ओच्छे सदन मानदेन जयजयकार तगै। आमेन।

३:१० मती २४:४३; लूका १ २:३६; १ थेस ५:२; उन्बा १६:१५

३:१३: यशै ६५:१७; ६६:२२; उन्बा २१:१